

Purtretà l'original Zarli Carigiet

In film da Felice Zenoni

■ (anr/fa) Per incumbensa ed en col-lavuraziun cun la TvR ha fatg il cineast Felice Zenoni in film documentar davart il cabarettist ed actur Zarli Carigiet da Trun. A la premiera dal film eran preschents er confamigliars da Carigiet. Ses chau marcant, ses chavels tschurs e ses dialect grischun eran ses chapital en la Svizra tudestga. Sco cume-diant ha Zarli Carigiet influenzà considerablaimain durant decennis la tribuna ed il film svizzer. Il film documentar «Zarli Carigiet», ina coproduziun da Mesch & Ugge Filmproduktionen a Turitg e la Televisiun Rumantscha TvR, mussa per l'emprima giada fotografias e material da film, per part anc betg publicità, da l'artist naschì l'onn 1907 a Trun. Commembers da la famiglia, collegas da lavur ed amis sa regordan en il film da Zarli Carigiet, il qual na represchentava la rolla da l'original e nunconformist betg sulettain sin tribuna. Al cineast Felice Zenoni èsi gartegià da stgaf-fir uschia in purtret interessant e sorprendent davart dad in dals impurtants exponents da la cultura populara svizra. Oravant tut la rolla da Zarli sco actur che chanta en il Cabaret Cornichon l'ha fatg daventar en ils onns 1930 enconuschent en tut il pajais. En memoria restan er sias rollas en ils films svizzers sco p. ex. «Hinter den sieben Gleisen» (1959) e «Gilbert de Courgenay» (1940).

«In'invista sincera en la vita da Zarli»

L'onn passà avess cumpleni Zarli Carigiet ses 100avel anniversari. En quell'oc-



Il figl Toni e la vaiva Doris Carigiet-Eberli cun il cineast e reschissur Felice Zenoni.

FOTO F. ANDRY

casiun aveva fatg la TvR ina pirtschn'emissiun per il Telesguard. «Quella giada è naschida l'idea ch'ins pudess far en sasez insatge pli grond davart questa figura sursilvana», ha ditg Bernard Bearth, substitut manager dal TvR e manader infurmaziuns RTR, «er sche Zarli Carigiet ha lavurà adina mo en tudestg.» Cunquei ch'il cineast Zenoni fascheva l'onn passà gist in film sur da Paul Burkhard («O mein Papa») che ha vivì dal medem temp sco Carigiet l'ha dumandà Mariano Tschuor

sch'el na vuless betg purtretar Zarli Carigiet. Gievgia ha mussà la TvR il film a la vaiva Dorli Carigiet-Eberli, a ses figl Toni ed ad auters confamigliars, al producent Beat Hirt ed als represchentants dals meds da massa. «Igl è in fitg bel film, el dat ina bun'invista en la vita da Zarli», ha ditg suenter la preschenta-zion Dorli Carigiet, «il film è er sincer e na zuppainta che mes um saveva esser mintgatant difficil.»

L'autur dal film è Felice Zenoni, a la camera era Björn Lindroos, il tagl ha fatg

Christian Müller, producent era Beat Hirt. Per la coordinaziun cun la TvR ha procurà Claudine Cavegn, il respunsabel per la TvR è stà Mariano Tschuor.

Datas d'emissiun: Dumengia, ils 14 da settember a las 17.25 sin SF1; mesemna, ils 17 da settember da las 08.40 – 14.00 sin SFinfo; sonda, ils 20 da settember a las 17.15 sin SF1; dumengia, ils 21 da settember a las 07.40 sin TSI1 ed a las 13.15 e 20.20 sin TSR2; glindesdi, ils 22 da settember a las 09.40 sin TSR2.